

111
21450



秋潭外集卷第三

尺牘

長陽

秋巖十二

八月便人附去一緘想入記室入冬以來伏惟起安
 善百凡暢遂足慰遠懷吳中巨案紛如頃來想俱恬適
 閱邸鈔欣知節憲以饒使推轂閣下雖未邀允准然
 聖意為政體起見至公極明至龔黃之績上結
 主知

天語煌煌宣示天下有識之士無不眉飛色舞一歲三
 遷豈足以為公祝所冀益宏遠謨上足為



尺牘
朝廷倚重下足爲生民利賴他日鐘鼎丹青庶不孤負
聖心也淑磴磴自守非石可轉但年齒日增返觀內省
正覺通身是病其於人事齟齬之處時復覺得血性氣
質之累多而學問變化之功少然根基不深一爲事物
搖惑必致徇俗墮棄古人稱貞不違俗此四字煞非容
易風雨如晦雞鳴不已閣下能不時有以教之耶禾中
有沙木其所著說文數百卷去歲赴嶺南謀梓未遇
昨返至吉水攜有古研百餘多奇物頃來謁閣下求介
於會都轉茲特爲之先容渠父子篆隸俱工鐵筆精極
并有都轉之友吳白广書一函并寄存臺端沙君若來

卽乞一書并致去也

秋巖十三

三月八日得賜箋具稔去歲一函已塵台覽并蒙卽專人至禾中領到星實師手札寄下豈勝感佩之至卽日伏惟鈞履綏吉潭祉暢順爲慰淑謬附卓薦循省自慚來教期望誠殷所言甚大非淑所敢當然敬戢良箴亦不敢不因自此勗惟是莅吉邑七載以來前政三數虧累僅彌補得一半刻下不准挪掩計彙銷尙短一萬六千雖據實合盤托出正不知如何究竟公私棘手未有甚於此時且此後貴州縣彌補到底教從何處來也昨淑上書萼樓糧臺以爲刻下將捐款一項奏請開銷而

卽以爲彌補之項蓋江西捐款每年不下十萬卽如淑
六年來已捐八千餘金此弊不除仍是教猱升木也閣
下以爲何如兒子分發浙江渠來請訓望剴切教勅之
書稿二紙并呈覽將來北上時不知能鼓棹秣陵舉蕉
葉與髯兄痛飲否極想極想

秋巖十四

正月兩得賜函後一緘并得星實先生手筆隨佈札由
遞中端致想入司籤嗣窘迫礪碌又意閣下當已入都
故久未上書而亦久不奉尺一思詠之懷祇深馳溯七
月中令壻平度公子赴粵道出吉水承枉顧淑適下鄉
勘災僅畱二日未快晤爲歎蕭緘兄在署具述令壻所
言及頗詳如聞香巖先生有西河之戚惋悵如何可言
前承代致一項因循尚未歸楚不意遽得師道山之信
悲感難言想吾兄同之也卓薦知縣五人其四俱已得
代惟淑承大憲以此地漕務棘手藉案咨畱叩頭哀乞

亦不允許不意七月十七日寧都州廣昌雩都南豐各處蛟水大發漂沒城郭田廬淹斃人口以數萬計而吉邑以是日溪水陡漲漂沒田廬以千計幸水至以日中并未損人淑赴鄉勘查撫卹至八月初旋署而大憲由贛州勘災回省於是月十八日差事甫畢吉邑地瘠民窮將所勘情形縷細具呈憲意甚覺煩難是以淑竟自行辦理惟是詳辦雖所及有限而淑可以省累自辦則所費不貲身受累而民情可以安帖蓋淑所慮寧都毗連閩粵俱於是日大水受災均重若目前僅一撫卹而已有名無實此後飢寒交迫萬一附和羣不逞爲流民

爲土寇事將若何昨節使過境時雖剴切稟及不知以爲然否也閣下入都的於何時淑不稔來歲春夏之交得脫身否便中尙望示我程觀民以代務又赴山左茲其令郎赴濟南上謁閣下意有所商便布數行一詢近履草草不能縷悉不宣

秋巖十五

十一月初六日礪堂觀察過吉淑晉謁舟次如見稽叔
夜衛叔寶一輩真有珠玉在前之歎旣蒙垂詢并述與
閣下至好此次由秣陵尊處畱晤數日而閣下寄聲問
訊不佞勤懇數十百言觀察重閣下因信閣下之所以
先容者而加之物色獨塵濁下吏殆難爲懷耳乃於十
三日奉到賜書知八九兩月候函已蒙鑑及垂示一切
亦首及礪堂先生時王袁州因公事在縣齋方與淑飲
及閱尊札因指其札中語云秋巖亦豈俗下可得相與
大息者久之淑處漕事棘手之甚其桐江住岐兩倉尤

劇不得已請於上憲十月委王郡公與樂安縣來吉監收今已一月幸可蕙事雖竭廢已甚尙得立於不敗之地漕兌完時必力懇卸手將來入都擬取道杭州赴禾中上星實先生塚一慟也吳下做本家彭碧筠名灋乃芝庭先生從子十六年前淑在饒州與敘宗系年來渠薄遊西江爲何春巖客其人才學不凡兼抱風骨而縝密如晉人使材雖履綦閒亦有條理淑最所推重比因親老還吳思欲於左近得一館地特介之閣下若明公置之壁後凡刑錢書記一切可以綜理非特以情託閣下實因此人不易得也不宣

秋巖十六

淑于役秦中經年今春二月還章門適永定觀察陳竹香由維揚赴京縷函附呈三月十五日山妻卽世四月初某縣丞送到寄札累數百言訊問纖悉所以垂念不肖者披讀之餘淚滴懷袖旣緣感念深至又每得閣下書山妻必具詢詳細輒爲我歎息知己落落天涯也時礪堂先生訊適至縈念江寧時承審一案因以手札附呈去後越日又得書具道吾兄無絲毫之累喜溢墨楮於是淑南北東西屈指離吉水已三年矣家累住省城賃屋貫米及公事一切逋累甚巨且知己不過數人山

妻居其一一旦舍我苦無聊賴四月十三日位置殯宮
後熒熒然挈二僕捧檄之浮梁邑民氣尙淳因景德鎮
五方雜處賈豎傭徒不三不四之輩且二三十萬人承
以癯弛積疲之後案牘山積日不暇給憂患之餘體中
時復病劇數月以來雖廓清得十五又以漕事縈心而
責彌補徵常例者已紛至沓來民情未嘗不愛戴而望
我者無盡上司未嘗不矜憐而責我者無已嗟乎知我
念我者獨有一秋巖以秋巖之知我念我而知我念我
者又獨有一湖西觀察淑何人淑又何所挾持而歎老
嗟卑耶抵浮以來岑岑然如在雲霧中過日致未一奉

書於左右茲於九月十三日復接賜札把玩迴環承慰
念并具示一一疎懶歉仄溯洄想思一時竝集矣伏惟
尊兄以精白之心副以經世之學以得爲之際且受
特達之知四府本非常調以吾兄居此必有出于尋常
萬萬者能愛百姓然後能顧公家又必能顧公家然後
能愛百姓州縣立意爲甚不肖者亦少但下材特多庶
幾乎吾兄以至誠惻怛之心精明幹濟之才合百姓公
家爲一體與僚屬說家常話與公家辦家常事吾卜佗
日汗青不必減周文襄也淑與閣下年相若而才與不
才奚啻天淵白髮盈梳青山入夢無家可歸又不名一

錢北門已焉哉漢書命也夫聊復自解爾爾刻下料理
得詩集十卷外集尺牘十數卷享帚千金吹劔一呖不
值畱念特爲人慙慙耳小遲當寄呈以博一笑大旆頻
移皆江南佳麗地風流爲政又多佳賓客足以自娛歎
羨文福惜不得來摳衣就下坐耳年來鬢絲禪榻粥湯
藥裏世味久已泊如惟感念知己時一振觸於世無裨
於身有損終須掉頭塵網也

兩湖軍門

自庚子春違離以來於今十有六載依慕之忱有如一
日乙巳夏閣下自黔中開府移節西江眷屬先抵南浦
淑時客遊南昌方期得快瞻仰之私繼知復奉
恩命移撫三秦旋奉鎮撫邊要中西域而立幕府十年
以來鴻猷炳彪

隆恩稠疊中外所共欣戴近知楚北軍興上煩
廟算恭聞閣下秉鉞之信靡不額手喜歡敬想節旄莅
止全楚卽日平寧鐘鼎竹帛繼美名賢不朽之業在此
時矣誠幸誠祝淑原籍長陽縣賊匪甚熾眷口雖來江

西兄弟俱在里門五月中差人往探六月得家信胞兄
拔貢楊金玉本名彭淦及姪廩生世德俱奉幕府檄召
帶領鄉勇堵守榔亭都鎮灣聶家河一帶各離城百數
十里而家口俱在城中淑身在西江心懸鄉里恨不得
躬荷矛戟以效前驅復不能親執耰鋤以衛坵墓惟有
叩祝一埽欃槍遂銷劍戟
天顏有喜萬姓無憂此四海歡幸所同心尤淑一人叩
禱之私願也

曾雲溪

倥傯之際獲捧尺題妙墨深情良堪愛玩所謂黃茅白
葦之中一枝擢秀者耶今日吉令之難爲足下來札要
言不煩已經洞見癥結歷數十年來凡易令十又二人
俗敝民貧役疲吏黠夫以誅求之無時行李往來疲于
奔命彼蠹而黠者常伺其急而售其縱橫之術而凡來
令於是者皆非能進退裕如之人因循隱忍敗壞而不
可收拾至於今日極矣是故碌碌者喫紹興酒擁黃紬
被其他所不知才雋之流有掉臂而去耳若僕者左聽
子規右聞鷓鴣駘麟之性不能脂韋羸憊之軀豈勝繁

劇擇禍莫若輕正恐三十六計別無上策也交代限期已逾一月款摺寄午園處足下可試覽承諭王前政歸櫬一事足徵見義之勇淑前月已騰書南昌昨又分札吉郡各邑亦不知能否有濟英喆喇又有來信甚著急且失笑也天清氣爽遂入初冬足下栖託好佳願復能枉顧否判牘之餘聊佈數行便請近安唯鑒不具

章實齋

夏閒鄂城獲邀良覲克遂披襟之歡頗叨入林之契先生酒龍詩虎睥睨人豪枚馬之徒不足以扶輪驥駕秋帆尙書以一代龍門搜羅文獻得鴻筆之儒藉手其間楚志之成知爲國門不刊之書矣通志想已勒成文徵一書恐年內未能卒業不知先生入剡之興果在明春抑正須句畱也憶昨七月七日揖別放舟風水順利四日已抵豫章紛紜倥傯殊可笑人八月初旬遂有吉水之委地當衝繁俗稱做壞故家流風餘韻則盡矣奈何三月以來日不暇給每懷雅範祗切溯洄比想道體吉

綏足慰馳仰胡維君兄栖托好佳竝以念念匆匆草泐
佈候不旣

黃當陽

籍甚聲華久深欽佩祇以天涯踪跡未遂親炙之懷瞻
睇雲樹祗勞溯洄伏惟門下名邦杞梓世胄芝蘭江夏
無雙之譽潁川第一之稱以儒術緣節吏事潤澤所被
不獨遍於沮漳卽淑粉榆之社亦叨沐九里之潤雲蒸
霞蔚鳳翥鵬騫當洗耳而聽佳報也淑下里散材二十
年前得出棗陽夫子之門不意歲月蹉跎迄無成就頃
年作吏西江更爲碌碌昨年七月由里門服滿赴江八
月得補吉水茲邑地當衝劇其難治爲江右之最而虧
累無著數逾三萬纔入首春已爲彙銷著急孱軀菲才

何以堪此惺齋世兄去冬來署老成溫重宛有家風下
榻荒署強爲淹留獨慚羅雀之室不克有所潤澤耳茲
因貴役朱元還楚之便泐函佈候仍望有手筆一致惺
齋可不必急賦思歸引也

楊長陽

去夏鄂渚一札想入台覽嗣於七月底到豫章得補吉
水八月廿六日攜眷抵任此邦劇邑鄉先正之流風遺
韻久已無存前政係病故虧短無著數盈三萬漕倉分
於七處歷來辦理總無善策數月以來兩鬢斑矣纔入
首春便爲彙銷著急公私之逼促已難覩縷而差務絡
繹無虛日我輩窮薄相正當以義命自安迴憶台臺山
城臥治便是清涼國界矣吉水乃雋才裏足之地每誦
老杜何鄉爲樂土焉敢尙盤桓之句撐持煎熬不敢失
墜唯念古賢豪如玉在石中愈磨愈光淑自度如瓦缶

天
凡
三
磚硯榻可將就磨之不已必有粉碎之憂六兄其何以
教我
家兄行年五十有六因循尚未就職祈鼎言敦勉
俾得赴省驗看以俟機緣便羽數行佈達用致積念不
宣

觀察張認齋先生

備員宇下一載於茲瞻仰榮光時深馳溯前月進省始
得摳衣上謁親承訓言荷蒙勉慰交深逾格屬望下吏
感悚之懷無言可喻叩辭以來倏及半月恭稔台候吉
綏豈勝依慕伏念閣下秉德植身讀書經世天下之士
久已想望風采自莅西江凡所以念切民瘼而訓進屬
吏者至情諄到已經一載且轉漕事務殷繁而憲節勤
瘁清約之下猶時時以地方之疲敝實在情形勞心籌
畫凡在屬吏苟非甚不肖之人未有不誠心感戴思保
身名但積重之勢已非朝夕惟有仰賴閣下陶鈞庶類

庶幾月計有餘以求潛移默轉耳淑家居荆鄙世承寒素讀書既無師承四十之外甫經學吏又不嫻於時務惟是謹持寸心固守廉恥以求免於罪戾而愆尤多方救過不遑惟當日慎一日以期仰副訓誨栽培之至意也

訥齋觀察二

前月底奉到札諭荷蒙俯賜誨訓且矜憐愚昧因其一隙之明曲爲開牖示以必敬體勤用而後可以言慎之義玩味紬繹正覺於此一字尚有咫尺萬里之遙不覺通身汗下然藉有以窺大君子持心莅事本原之所在亦不外是故言之親切所謂無隱乎爾也自傷未嘗學問玩愒歲月至於今年逾五十學吏十年動多窒碍日累日深進退維谷蓋其始也未免尤人其繼也因而自怨大要皆客氣也今已見爲客氣而無以勝之則亦終無以自立而不免小人之歸然則舍敬勤曷以哉秉炬

者不及日中然勝聞行矣淑雖不敏請事斯語矣昔者
陽明先生所至之處見似人者輒誘掖之故成就爲多
伏念先生讀書莅政何必減陽明淑不敢比於門牆但
求得爲似人之列而收秉炬之效倘蒙始終矜憐而訓
進之則幸矣

附來書

鳴琴一載卽著循聲慕蘭之忱於前月獲摠悃款特
以閣下人如玉尺相視莫逆不覺吐露以誠舉凡立
身治民諸大端剴切敷陳幾自忘其狂瞽頃荷賤言
賁及發函三復具見憑臆抒詞摯愛謙沖奕然毫楮

每念鴻才碩德久符明府之稱乃德盛不居美猶有
憾自謂救過不遑日慎一日夫慎者敬爲體而勤爲
用稼書先生言之諗矣處事惟勤能補拙持身克敬
便生仁閣下以詩書之澤爲慈惠之師七品郎官上
應列宿旣本此謹持一念有守有爲則凡所以求民
隱而報國恩者不外乎此弟曩直樞廷尚堪藏拙
一官外授幾如萍梗之汎洪流去秋自抵南觸事動
形棘手一切轉漕事端其病在乙年之用例取給於
甲歲所徵而奏銷乃在丙年之夏於是各屬挪移
之弊司漕支絀之情遂至不可救藥且運丁貧疲日

甚前此隸軍籍者頗有殷家而州縣僉丁不公殷者轉以賄免逮頻頻賄免卽殷者亦疲迄今簽任儲航大都孱乏欲思補救之方調劑之法計將安出昌黎所謂蝨其閒者旣慚且懣耳大抵近日官場惟錢糧最不可辦一經涉手輒形炊婦之難下屬上游情同一轍處人處己鄙見尙明特因竭蹶辦公不得不藉催提之力若瞻徇隱忍勢必以自悞者悞人而各處不鑒苦衷錮於成習誠如所諭積重之勢已非朝夕欲求潛移默轉其可得耶賢令設施固從本源做起胥江省而能知上緊公事則吏治駸駸日盛矣逃聞

化疆寧謐兩澤應時晚禾芄茂此卽異績丕昭無任
怵慰

訥齋觀察三

四月初一日接省信知高安一案已經奉到

恩旨因公離任拂袖誠我公之心

賜環亦即日之事獨下吏依戀區區難爲懷抱耳淑不學無術忝顏爲吏日夜疚心旣無以效當時之用又無以爲衣食之資進退維谷貧病交加是以思擇禍莫若輕之義瀝誠屢懇冀蒙各憲憐念哀其狗馬之疾遂其麋鹿之性而未蒙見察夙夜靡寧今閣下脫屣西江淑倍益俛俛之慨不知此後幾時得復望見顏色也今日之弊防吏者無來路防民者無去路以貪使之以廉責

尺牘
之是無來路也健吏驅賊以鄰爲壑耳不能化而爲良也武人捕私鹽有草菅人命耳不能使其易業也是無去路也誠能使天下之吏能爲廉吏必能化天下之民能不爲盜民閣下他日在

帝左右陶鑄人倫所以回風氣而報

朝廷者儒術吏治淑猶將拭目俟之矣

秋潭外集卷第三終

秋潭外集卷第四

尺牘四

長陽 彭 淑 秋潭

馮魚山

溯洄舊雨闊隔廿年天假之緣上春於南浦驛畔重瞻道範比舟過文江復承枉顧荒署得以周旋教益罄我渴懷眞非同尋常欣幸也兄學道旣深殖學旣富如祥麟威鳳足以照耀人寰而自視欲然故舊之間情意懇到此淑所心往神追萬萬不能到者徒以邂逅倉卒不能多侍左左且吾兄純孝歸舟甚緊歉然之懷如何可言正月廿七雪夜江干篷窗與昆玉及諸姪劇譚歸來

心甚悵悵晨得手書知已遄發今遂忽忽逾月嗣於三月六日得南雄舟中二月廿二寄札開函把玩情緒紛披計其時已應抵珂里矣來札齒及粿粿已令人慚至於拙藁直下里之音耳而重辱賞歎蓋賢者與人爲善之心如是承諄屬寄王述菴先生比卽料理適有便鴻月內可以馳去矣蒙賜二小兒隸書千文謹以珍襲渠經書尙生稍待年餘然後授之臨摹素絲之質正欲附近朱藍冀他日得出鈞陶也淑作吏十年撐持熬煎不堪言狀唯方寸依然脚跟如故昔賢所云存心愛物於物必有所濟者略得彷彿汲深綆短多病奇窮於世無

補而自損多矣中材涉世亦復有以自處毋以爲念秋閒大事畢後爲能偃息田里抑求有如嚴鄭公者如肯以三百金作豫章之遊則淑能爲兄埽榻唯裁之

馮魚山二

別來瞬逾兩載思詠之懷亦云勞只中間曾致一書正以浮沈爲念比接中州仇令親遞寄賜緘縷縷數百言得悉前函已入司籤并諗年來侍奉吉慶起居住安尊甫大人牛眠卜吉大事嚴辦會葬者且數千人仰見至孝有以光增先德惜淑不得申猶子之義與於執紼之末甚慰之餘又以悵然也捧誦來書至今弟四兄之變一節駭悼非常以四兄純謹儒者束脩自好方冀二難輝映爲吾黨之光不意爲親勞瘁遂以死殉也迴憶都門畱滯蕭寺過從雙樞書屋宛在目前及前歲章浦停

舟文江話舊轉瞬天涯又弱一个誠悲誠悼不可爲懷
況乎閣下至性過人友于愛切何以堪此所望上承系
屬之重下爲弱穉之謀且吾兄名德問學海內倚重萬
萬爲道自愛是所至禱比惟廓然以來未諗栖託里門
抑尙有薄遊一嶺之隔音問尙可以通思得手筆以慰
遐想

大上皇帝鼎湖功成敷天悲痛

今天子仁孝生知

至明至斷繼美

列聖此億萬年無疆之休薄海內外臣民百生難遇之

至幸也君子道長不勝爲賢者慶敬想

朝賢引領閣下可以脂車矣承需挽章容當再寄吳白
廣爲大庾學官詩筒往還頗不寂寞第淑不能讀書酷
無變化兼簿領勞勞卽偶有所爲亦殊不足寓目簾草
一帙去秋所得附函呈政不宣

錢潤齋大守

淑荆楚凡材抱質駑下弱冠以後卽奔走衣食雖粗學
文詞未能卒業輒復棄去部婁無松柏又起自單素師
友之益益寡迄今作吏十年年且五十十指如椎敢談
文藝不意閣下過聽以詩文垂詢無以仰答下問昨二
月廿二日晉謁復荷詢及愈增感愧閣下青緇世德照
耀人寰家傳賜書人有專集金閨之彥玉尺之衡衣被
於天下閣下更以儒術緣飾吏事淑幸隸宇下無以稱
副雅懷如大君子不遺葑菲之意何因錄莅吉水以來
所作詩一冊獻於左右伏乞塗乙點定俾下里之音不

至成無脛短笛幸甚幸甚竹頭木屑思効用於大匠之門伏櫪之馬望伯樂而驥首其志則亦誠可矜矣

錢潤齋大守二

自大旆正初赴省旋卽接運公出之後依戀之忱無日不如侍左右不意傳聞有進賢濕米一節日夕未嘗去心昨得省信乃知已奉

恩諭因公暫行離任此在通省上下吏民一切無不歎悵淑驚駭之懷何以爲諭伏唯閣下自到江五載以來廉潔以率屬仁愛以臨民慎重倉庫使積疲之區均得有起色而於揚清激濁之間豪無成見吉州風氣蒸蒸日上蓋功在一郡者如此江西漕政做壞可悲可駭之故久已視爲固然自前歲閣下攝事以來剔奸釐弊動

中肯繁起垂危之症而更得安全是以上游倚重今年
又請

旨畀茲重任蓋功在漕運者如此發謀出慮可以成務
談言微中可以解紛疾惡如仇讎愛才如性命嫌疑猶
豫之際推挽保全之餘其益宏矣蓋功在通省者又如
此以王謝之門風著龔黃之偉績於以翔步屏藩從容
節鉞本家學以光

聖治此又識與不識所共屬目者也夫非力所及與寵
辱不驚誠無愧於前賢而古今異宜同事異罰在閣下
磊落光明豪無介意又況

題屏簡在行必重爲

倚畀此不過長江大河之一曲耳顧爲一郡惜爲一省
惜又爲淑一身惜者此誠西江十三府州知與不知之
公言也敬想高懷坦豁盛暑長途起居安勝卽日不審
可抵豫章盼望行旌中懷若結昨日江寧郡公來信知
已卜宅秣陵官眷想不久啓行署中一切知己具有部
署旆從來江想不更至郡垣尙當趨省叩領訓言以申
下懷至淑涇涇小人久沐陶融有過當改之處痛自刻
責其不能改者亦自無可如何所謂窮骨相也今歲不
知能如何少添虧累再言彌補其將誰欺擬俟

計本一出卽出詳引疾調理痊日再圖報効也

浙臬陸璞堂先生

去歲欣值閣下秉臬西江淑因公事羈牽未及趨謁荷蒙閣下所以矜憐而曲全之者至再至三感激之餘方謂得所依歸師資有藉不意遂奉

恩命移節浙西比趨赴章門追攀莫及悵恨之懷迄今莫釋伏唯閣下中秘名公外臺峻望以文章飾政事本忠孝爲經綸仰荷

國恩無慚家學旬宣之績封疆之任此天下

景星慶雲之望尤淑所願更沐陶鑄終被恩私者也淑自去歲仰蒙中臺嚴飭日加謹凜所欣地方年穀順成

尺牘
民情和戢足以拙誠相安秋間奉調入闈十月旋署漕
務甫畢卽值節使出巡仰承訓慰有加皆由恩私所被
惟有日慎一日循分供職以求報稱於萬一耳

錢湘船學士

春莫潘韶州道出吉水捧讀閣下惠賜手札遠辱垂念
銘泐曷極韶州云閣下問訊極其懇懇具道所以夫泥
塗之去青雲誠霄壤矣閣下祥麟威鳳希光景者眾矣
而猶不忘一偶然覲面之塵吏此其胷次浩落誠不可
以世俗之見測之也頃者復承遷秩儲端真有得賢之
慶就諗台候起居安勝百凡暢遂下風景仰豈任欣慰
淑荆鄙猥士局束下吏待罪吉令者又已四年前年閣
下以皇華之使嶺南往返皆得近接風采惠邀譚醮先
人像讚并得蒙大筆以爲世世光華徒以鹿鹿風塵塵

容俗狀不敢率以尺題溷於鉅公之前以資笑具乃承閣下在遠不遺深用恧然然疎怠心跡知蒙鑒原耳山色不如歸興濃吏情淡矣衣敗絮行荆棘中奈牽扯何言秋部楊邁工葉雲素李小松皆淑故人小松又閣下佳士晤時并希爲道意敬盼旌節道出豫章冀於負弩之餘一罄積忱也

觀察張萼樓先生

竊自閣下臨莅江右馳慕瞻依之念久切於心正初上旬始獲晉謁崇階荷蒙逾分容接所以矜惜之者無所不至類非尋常屬吏所能得於上憲惟章門三日僅得請謁兩次辭謁登舟篷牕兀坐之下溯洄紬繹旣感且愧亦藉有以窺大賢用心之萬一者淑生長陋邑門第單寒固陋迂拘無足比于當世之士年已四十始叨一命雖服膺儒先存心愛物之言而動多齟齬蓋救過不遑於斯民何有實濟幸西江上憲多賢者卒賴保全以迄於今然如閣下初未一面卽多方愛恤以爲之地晉

尺牘
謁之頃懃懃懇懇不以眾人見遇自問何以致此蓋大君子之於人也見善若不及雖其稍異於流俗者猶將獎藉之雖其才非有用而猶自飾於向善之途者猶聞而歎賞之然則士宜如何整礪濯磨體用具備以慰其與人爲善之心而成其以人事

君之志耶淑所以於感恩之餘愧畏無已也伏惟閣下受

聖主之知爲天下之望將大用所學以補黻

隆平之治

國家遠邁漢唐在於今日竊敢以周文襄王文成望閣

下淑碌碌下吏願得備竹頭木屑之用硜硜之守始終不渝卽所以報知己矣

附來札

正月廿六日正在讀吳照南聽雨齋詩適奉手翰過承推許愧何可言卽此尺牘一篇疎古兀傲之氣溢於楮墨言爲心聲可徵治績不羣及誦秋簾長陽諸作閱卷一章發明以人事君之義竹枝一卷備載土風所得於風雅者深矣竝悉與照南亦夙交照南之詩自吟之熟矣實愛不釋手頃刻之間又得大作可謂兩美合也何快如之草草奉復竝候近安有腳陽

春此際想仁風更鬯也跛子望之

張萼樓觀察二

二月中人回賚到鈞札捧誦再四感愧交深擬古風七
首薄弱淺近誠不足以揄揚盛德猥蒙德音俾繕本呈
上淑本不曉作字旣奉鈞諭諄諄卽不敢倩人代書心
麤手硬并爲惡札上塵臺鑑慚恧竦惶不可言喻卽日
伏惟閣下政務餘暇福履綏嘉爲

國祝頌曷云欣喜如聞藩憲釐剔宿弊新糧不准挪掩
自此各縣倉庫當水落石出然此後補苴必有上策方
可一勞永逸壅木之根而剝削其枝條清水之源而汜
監其波濤其害未有艾也夫盜泉之水惡木之陰向之

所賴藉誠無慮於今日然而捐款一項猶木之剝削而水之汜濫也計每年每縣捐款不下一千五百合計之則每年且十萬卽如淑到任六年以來奉叩捐款數已八千兩有餘若蒙剴切敷陳俯准將捐款籌畫開銷卽以此項扣爲彌補總計亦不過五六年可以完善皇上至仁至明子庶民體羣臣之經斷斷不肯偏重大臣公忠體

國自可言無不盡舍此以外卽蒙

寬大之詔一切無問而捐款不除欲求吏之廉亦不可必得之數也愚聞狂瞽惟祈宥原訓示無任竦惕之至節序春深寒暖不時伏望珍攝起居以慰民望

張萼樓觀察三

接家人來稟始知閣下因玉體違調久未全愈屢有引疾之章昨日中丞不得已竟允所請西江事務甚殷況漕事在邇憲節難畱吏民驚惋淑更悵然如有所失鈞體所苦大約陰陽交虧火水未濟要使血脈流通然後能培養元氣此時暫遂拂衣得辭勞劇卽此天君泰然已得靜以御紛之主勿藥之占喜可知也前在省垣未得面陳悃曲顛頓衰憊之餘因思卓薦部覆已到暫得卸手一面便得調理乃竟不蒙鑒諒於各憲還署以來憂心孔棘外念公家內傷一已職分卑微責任艱鉅文

法牽制進退維谷當此無可如何之時亦惟靜以聽之而已無任馳慕之至

李雲門學使

頃者敬悉大節按臨潯陽各郡試事將竣計旌旆還駐省垣當在夏仲伏惟

天顏悅豫侍奉吉祥自公之餘道體康勝景星卿雲照耀東南洵海內所共欣戴也淑下邑孤寒樛散無用向者挾冊輦轂之下雖得屢承清光而劣陋寡學望塵自愧作吏西江以來十有餘載塵容俗狀益復不堪言述自築戟遙臨傾向之忱雖切惟自顧無一可證於賢者之前每一念及輒深悚惕蒲柳之質多病早衰思鷓鴣之巢林愧駑馬之戀棧烽火未息無家可歸中材涉世

天
尺牘
三
恐懼多端伏望閣下念其出於鄉里察其稍稍抱志節
得在訓誨之下卽出題拂之餘女蘿之悅松柏葵藿之
傾大陽誠不足爲喻矣

邱東河大守

承賜書知道體月來清勝并知引疾之請已遂爲西冷
猿鶴欣喜而我輦攀戀之懷其何能已伏念淑得與閣
下遇何晚也甫一載卽有此別又何早也此自恆情所
不堪況契賞在風塵物色之外者乎計出月須晉省當
爲先生紆道出臨江住三五日將盡吐其鬱勃稍慰依
慕之情耳承念淑所患左脅腫毒受病於肝初起如粟
漸乃蔓延闊三四指長且五六寸得此症者十九必死
然而吾生者吾任醫專用藥良也良醫之良不貪利而
飾也不急功而驟也不畏蕙前却雜亂無章而僨事也

吾亦信之不疑也不責其速效也不使他醫參差其議論而掣其肘也僅百日然後杖而得起猶戒以元氣已損少有不慎必有性命之憂是以迄今猶惴惴然然而可以不死矣玉山之說因其初定南昌新建又變而及此乃欲索多金補豐城此非力所能及也是以辭謝蒙閣下歎賞然則此辭當必不錯矣藏書各種謹拜受容面謝伏惟爲道珍重人還泐布不宣

陝甘學使陳遠山學士

淑以荆鄙寒士僕僕風塵爲下吏竊嘗企光景如慶雲之在絳霄自謂無緣得邀沾拂不意乙卯之秋閣下出使粵東道出吉水淑負弩之餘惠叨光寵具蒙折節之歡頗許入林之契中心傾佇莫可名言比旌節過嶺計日翹盼適以至緊之事于役百里之外往返且七日而閣下行抵荒縣猶延佇江干半日絮絮問家人以所由意甚悵悵并承惠貽妙墨種種小兒亦拜受書硯法帖之賜逮抵署仙舟已遄發過境二日矣中懷懊極倍深也念夫謙尊而光雖大人先生之盛節然求其情真意

聖才遺葑菲者蓋寡且其時閣下已持憲節將赴關中
淑又不能以時迎候蒙停橈垂念不啻親戚極可念也
夫人雲泥睽隔而於半面一言之契未嘗輒忘此其天
性誠有過人者以此意求閣下其孝於家忠於國痛癢
於天下而無麻木不仁之患者皆可見也秦風勁正得
賢者而師之理學而裕經濟節義而有文章人才輩出
拭目俟之但按部遼闊來往不易又梁益楚豫皆連秦
境賊氛出沒不常想亦借資擘畫伏惟台履起居綏吉
爲慰十載西江吉水已閱五年礚礚之守未嘗稍易倘
得廓清逋負卽當蕭然遠引名宦之心泊如也賊匪之

起忽然無端正以承平日久將不習兵兵不習戰致令
蔓延兩載黃柏山卽淑邑里之地軍興以來家兄弟姪
子輩俱帶領鄉勇堵截出萬死一生之餘迄今尙在戎
行昨得知賊勢已窮感計可以無慮迅掃櫓槍淨洗兵
甲敷天同禱也人便馳函唯台鑒不宣

李小松學士

憶丁未都門在蓮塘司業處聚晤別後不覺十有三年
伏唯閣下千仞覽輝一鳴賀世天下之士皆以先睹爲
快況在鄉里知舊之末其爲慶慰如何可言卽日伏諭
台履起居綏吉視草北門校書東觀讀經世之書宏不
朽之業知不徒以文采風流爲木天雅望也吾楚者碩
自夢澤克猷次侯石虹諸君子後百年以來風流歇絕
卽才如稚欽者乃似不乏而品更不逮今得閣下與雲
素竝出然後江漢之精神使天下聳然改其視聽閣下
本忠孝其致用要於純正雲素秀羸多能有賁育不

尺牘
奪之節而其學益加邃密淑流落江湖無足比於人
數然懷我好音如在左右小人涇涇自知分量蓋私心
不勝大願竊時時以燕許姚宋望閣下與雲素矣聞前
輩說江陵在史館時凡外省大吏至於州縣入都者必
先廉知輒攜壺酒二盞報謁曰知公匆匆願爲歡則訪
其山川田賦人物賢否民間利病歸卽篝燈細書於冊
其用心如此英雄細密未有不成濟時之才者也吾子
勉之淑作吏西江辛苦委頓不必言本因貧而仕今因
仕而益貧動多齟齬求去不能但二十年前措大身分
自在耳愧極愧極兒子富桡以縣丞赴部分發飭其叩

謁希時加訓誨至禱至感附呈近刻數種殊以慚慙不
宣

李小松學士二

上春家丁都門回展誦閣下賜函具悉一一恭諭台候
起居佳安聲望崇隆欣慰無可言喻小兒來稟縷述荷
蒙長者垂念飲食教誨至爲勤拳感愧之餘倍深馳想
旣已艱於裁答又因淑比謬附卓薦冀早晚入京承教
在卽不意人事牽絆迄今未果昨得閣下典試西江之
信誠喜誠快爲豫章人士慶喜乃不啻在己也伏惟閣
下原本經術根柢忠孝行將霖雨天下而以人事

君之忱實基於此惜淑以縣中冗務羈身不獲供奔走
左右中懷歉然高秋爽晶木天清迥至公披閱靜想

石上氣必應盡入搜羅他日定有六一宋瑞一輩不
愧門下所謂金春玉應松茂柏悅亦理之自然也淑鹿
鹿風塵一身將老八年吉水精疲力竭近計吏皆得息
肩唯此地因漕務棘手上游必欲淑辦竣方准給咨尙
未知來歲春閒能否動身公私竭蹶觀縷難盡乃七月
十七蛟水爲害漂沒田廬甚多幸未傷損人口月來捐
廉撫卹但費多則力旣難及費少則所及有限不但不能
無一人不得其所而補苴目前不知何以善其後心
力交瘁何益之有閣下丹鳳在霄下視垂翅之鳥想亦
心惻惟祝他日陶鑄人倫挽回風氣士厲廉隅民歸忠

厚繼美家學上報

國恩無愧古名臣卽泥塗故人與有榮施矣雲素志節
之士願以經世之業相勗勿志在文苑傳也二小詩奉
懷輒用素箋呈上聊摭情愫布鼓雷門之譏所不嫌耳
徹棘在邇恐未得面晤草泐布瀆惟祈雅鑒餘俟續上
不宣

秋潭外集卷第四終



